



Sabtu, 10 Juli 2021

Ogen: Esekiel 5:1-10



Musuh Dibata



Esekiel isuruh Dibata muat pedang ntelap guna ncukur buk ras janggutna. Gelah ibagi telukenna jenari dua bagin ibenterken ku api ras iciluk janah sada bagin nari ipunjut ku bas jubah Esekiel, jenari icaburken bas dalan. Buk enda gambaren bangsa Israel si ibagi jadi 3 bagin, 1 bagin mate perban kelihen ras pinakit, sada bagin mate alu pedang perang janah sada bagin nari ibenterken ku bas pembuangan. Sitik buk si ipunjut e lambang bagin sisa-sisa bangsa e si kawali Tuhan arah mara ras si iselamatkan kenca pembuangan ku Babil.

Tuhan la sukah merawa janah mbelin perkuah ate i bas IA. Tapi keleng ate Tuhan la banci ipermainken. Bangsa e nggo jahat man Tuhan, itamaken Tuhan i tengah bangsa si deban, jadi bangsa kebanggan Tuhan, tapi kecewa kal Tuhan sabap jahaten bangsa e i bas nundalken Tuhan, mpermelaken Tuhan alu penembahen berhalana ras kegombangenna. Erkiteken si e me maka itetapken Tuhan me bangsa si ikelengiNa ndube jadi musuhna. Musuh si ngaloken pernembah ateNa, si kesilohen pasu-pasuNa. Labo perban lanai ibereken Tuhan pasu-pasu e, tapi lanai ngasup bangsa e ngalokenca. Seh maka perubaten ras kesirangen em si jadi nandangi bangsana e si erbahanca megogo ras ndele ate bangsa e iadepen Tuhan.

Jadi banci kin kalak si ikelengi Tuhan kebenen perkuah ateNa? Jababna banci. Pas bagi pergeluh bangsa Israel e. Adi kita ndabuh ku bas dosa, adi situndalken Tuhan, lanai siikutken sura-suraNa, sura-suranta ngenca si pebelin-belin. Si darami si meriah si akap lanai si ikutken kai si jadi rancangan Tuhan man banta, jadi me kita musuh Dibata. Mesui ateta sabap lanai Tuhan ras kita jadi temanta. Adi Tuhan jadi musuhta lanai lit dalan pulah, ukumen si mberat ras kematen jadi sikerajangenta. Emaka mari mulihlah kempak Tuhan, tetap jadikan Tuhan temanta, ula sempat kita jadi musuh Dibata.